


T.

*Brief van het Hof van Holland,
enz. aan die van Ysselstein,
den 14 September 1566; me-
degedeeld door den Weledelen
Gestrengen Heere Mr. C. A.
van Wachendorff, Oud-Raad
der stad Utrecht.*




 Die Prinche van Oraignen grave van
 Nasou van Catzenelboge Vianen
 Dietz &c. Stadthouder | G. President
 en Raiden des coninx onder hollandt Zeelant en
 Vrieslandt. Eersaeme Discrete goede vrunden.
 Up huyden hebben wy van de hoocheyt van
 de hertoginne van Parme ontfangen zeeckere
 missive van date den X^{en} September deser te-
 genwoerdighe maent vermeldende de selve dat
 haere hoocheyt ontterrecht is, dat vuyt zaecke
 van dese tegenwordige beroerten troublen en
 commotien veele en verscheyden vrempe luy-
 den en vuytlanders hen vinden en commen bin-
 nen die Landen van herwertzovere nyet alleen-
 lyck deur die groote wegen en openbaer her-
 baenen maer oock deur zywegen heymelick en
 onbekende pasfaigen zonder wapenen en daer
 nae

nae hen onder tvolck steken en vougen aldaer zy lichtelyck wapenen crygen ende nyet en cesseren en ophouden tzelfde tot muiterye weder-spennicheyt ende rebellie op te roeren en verwecken daer vuyt zouden moegen ryfen en toecommen dinconuenien quact en allendheyt die een ygelyck kennelyck zyn zoe verre daer inne nyet versien en geremedieert en worde. Ons daeromme die voorz hoocheyt versoucken en van wegen Co^e Ma^t onsen aldergenadichsten heeren ordinerende dat wy terstondt en sonder vertreck die publicatien van opene brieven van placcate van voorz Ma^t tegens die vrempten en vuytlanders van daere den XXVI^{en} Juny lestleden zouden doen vernyeuwen alomē binnen den steden en vleckē van Holt. daer men gewoenlyck es vuytroepingē en publicatie te doen. Dien achtervolgen zoe hebben wy belast eenige duerwaerders van desen hove t voorz placcaet zulcx als vooren van nyeuws te publiceren. Waeromme zoe requyren wy u en nyettemin van wegen Co^e Ma^t lasten en ordineren opte voorz vremde ende vuytlanders scherpe en forchfuldige toeficht te nemen en te vernehmen die oerzaecke van heure comste in dese landen en indien de zelve daer van geen wettige ende apparente redenen ende bewys en connen geven, Sult tegens heml. sommierlyck ende sonder figure van proces procederen by ex^e van peyne int voorz placcaet begrepen. Ende daer suspicie zoude vallen van eenige quaede ofte onbehoorl. practyken ofte aenslach sult de zelve ter bancke en tortuere stellen om tot die waerheyt vanden feyte te moegen geraecken Ende die straffen nae den eysch ende gelegentheyt

L 2

van

van dien ten exemple van andre op peyne van
tselve aen u te verhaelen soe verre ghy in ge-
breecke bevonden zoudt moegen worden. Eer-
faeme discrete goede vrunden Onsen heere Godt
zy met u. Gescreven in den hage den XIII^{en}
Septembris annó 1566.

(geteekend)

B. ERNST.

Het Opschrift was:

Eerfaeme discrete goede vrun-
den Drost ende gerechte van
Ysfelsteyn.



Brief